

**Sinerissami tarnimikkut napparsimasut sullinneqarnerisa pitsaassusaata ukiut tamaasa nalilersuiffigineqartarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Naliliisussat tassaassapput atuisut sulisullu ulluinnarni pineqartunik passussisartut.**

*(Inatsisartunut ilaasortamit, Agathe Fontainimit, Inuit Ataqtigiit, saqqummiunneqartoq)*

### **pillugu**

#### **Ilaqtariinnermut Peqqissutsimullu Ataatsimiititaliap**

#### **Isumaliutissiisutaa**

#### **Siunnersuutip aappassaaneerreqarneranut saqqummiunneqartoq**

Ataatsimiititaliaq suliarinninnermini kingullermik ukuninnga inuttaqarpoq:

Inatsisartunut ilaasortaq Lars P. Mathæussen, Siumut, siulittaasoq  
Inatsisartunut ilaasortaq Knud Kristiansen, Atassut, siulittaasup tullia  
Inatsisartunut ilaasortaq Karl-Kristian Kruse, Siumut  
Inatsisartunut ilaasortaq Anders Olsen, Siumut  
Inatsisartunut ilaasortaq Agathe Fontain, Inuit Ataqtigiit  
Inatsisartunut ilaasortaq Mimi Karlsen, Inuit Ataqtigiit  
Inatsisartunut ilaasortaq Juliane Henningsen, Inuit Ataqtigiit

Ulloq 13. maj 2014-imi siullermeerinerup kingorna siunnersuut ataatsimiititaliamit sukumiinerusumik naliliivigineqarpoq.

#### **Siunnersuutip imarisaa siunertaalu**

Sinerissami tarnimikkut napparsimasut sullinneqarnerisa tamatumalu pitsaassusaata ukiut tamaasa nalilersuiffigineqartarnissaannik Naalakkersuisut peqquneqarnissaasa Inatsisartunit taparserneqarnissaa siunnersuuteqartup kissaatigaa. Sullissinerup nalilersorneqarnerani tarnimikkut napparsimasut peqataatinneqartassapput.

#### **Siunnersuutip Inatsisartuni siullermeerneqarnera**

Siunnersuummut akissuteqammi allannguutissatut siunnersuummik imaattumik Naalakkersuisut saqqummiupput:

**”2017-mi tarnimikkut nappaatilinnik sullissinnermut tunngasunik ataatsimoortumik nalilersuinermik suliaqaqqullugit Naalakkersuisut peqquneqassasut. Sullitat**

**attuomassutilittut taaneqartut katsorsaannermilu sulisut nalilersuinnermut UKA 2017-mi Inatsisartunut saqqummiunneqartussamut ilaatinneqarnissaat qularnaarneqassaaq”.**

Tarnimikkut napparsimasut atugaasa pitsannorsarneqarnissaat siunertaralugu suliniutit aallartinneqareersut ingerlatiinneqassasut siullermeerinnermi Naalakkersuisut oqaatigaat.

Sulianut aallartisarneqartunut tunngatillugu siunnersuuteqartoq assigalugu Naalakkersuisut *tarnimikkut nappaatilinnik sullissinnermut tunngasut pillugit nassuiaat, 2010*”-imeersoq aamma *Kalaallit Nunaanni qarasaasiaq atorlugu tarnikkut nappaatilinnik sullissineq pillugu nassuiaat* kiisalu *2012-imi piviusunngortitsinissamut periusissatut siunnersuut innersuussutigaa*t. Nassuiaammi 2010-meersumi anguniarneqartut anguneqarsimanngitsut Naalakkersuisut paasissutissiissutigaa, taamaattumik tarnimikkut nappaatillit pillugit sulinerup 2013-2017-mi nanginnissaanut pilersaarut Naalakkersuisut 2012-imi suliaaraat. Nassuiaammik suliaqarnermi Napparsimasut peqataatinneqarsimannginnerat, akerlianilli napparsimasut sapinngisamik pitsaanerpaamik sullinneqarnissaasa qulakkeerneqarnissaa siunertaralugu nassuiaatit suliarineqarsimasut Naalakkersuisut nassuerutigaa.

Ukiuortoortumik nalilersuisarnissamik siunnersuutip ilusimisut iluseqartillugu piviusunngortinneqarnissaanut sulisussat aningaasallu pisariaqartinneqartut aningaasaliissutaareersut iluini pigineqanngitsut Naalakkersuisut oqaatigaat, soorluttaaqtassunga sulisussanik pisariaqartitsinerup kingunerisaanik katsorsaannermik suliaqartut tamatumani atorneqartariaqassasut, taamaattumillu allannguutissatut siunnersuut siuliani allassimasoq Naalakkersuisunit saqqummiunneqarpoq.

Siullermeerinnermi Siumup aamma Inuit Ataqtigiit siunnersuut taperseritsik nalunaarutigaa. Sinerissami tarnimikkut napparsimasut sullinneqarnerisa ukiut tamaasa nalilersuiffigineqartarnissaa piaartumik aallartinneqartariaqartoq partiit taakku marluk pingaaruteqartutut isigaat. Siunnersuut napparsimasunut amerlasuunut taakkulu qanigisaannut sunniuteqarlunilu pingaaruteqartoq Inuit Ataqtigiit erseqqissaatigaat. Minnerpaamik inuit 900-t tarnimikkut nappaateqarput, taakkunanngalu 650-it Nuup avataani najugaqarlutik.

Sullissinerup naliliivigineqarnissaanik pisariaqartitsisoqartoq Atassutip aamma oqaatigaa, Naalakkersuisulli akissutaat akueralugu, matumani ilanngullugu allannguutissatut siunnersuut, tamatuma kingunerisaanik tarnimikkut nappaatilinnut tunngasut pillugit ataatsimoortumik naliliineq UKA 2017-imut saqqummiunneqassalluni, tamatumani napparsimasut pineqartut katsorsaasutullu sulisut peqataatinneqarnissaat qulakkeerneqarumaarluni.

Naliliisarnissamik pisariaqartitsisoqarneranut aammalu napparsimasut katsorsaannermillu suliaqartut peqataatinneqarnissaanut partiit tamarmik isumaqataapput. Politikkikkut

assortuussutaasoq tassaavoq qaqugu qanorlu akulikitsigisumik nalilersuinerit ingerlanneqartassanersut.

Tamanna tunngavigalugu siunnersuut Ilaqutariinnermut Peqqissutsimullu Ataatsimiititaliami suliarineqartussanngorlugu innersuunneqarpoq.

### **Ataatsimiititaliap siunnersuummik suliarinninera**

Kalaallit Nunaanni tarnimikkut nappaatilinnut tunngasut aamma napparsimasunut qanigisaasunullu suliniutit pingaartinneqartuarnissaat, ineriartortinneqartuarnissaat pitsanngorsartuarneqarnissaallu pingaaruteqarmat ataatsimiititaliamit erseqqissaassutigineqassaaq.

Suliniutit aallartinneqartut ataatsimiititaliap tapersersorpai, tarnimikkullu napparsimasunik qarasaasiakkut nakorsiartitsisarnermi periarfissat pitsaasuusut isumaqarfigalugit. Siunnersuuteqartumit Naalakkersuisunillu erseqqissaatigineqartutut tarnimikkut nappaatillit pillugit nassuiaatit assut pisariaqartinneqartut naleqquttullu ukiuni kingullerni suliarineqarsimapput.

Nuna tamakkerlugu tarnimikkut nappaatilinnik qarasaasiakkut nakorsiartitsinermik neqerooruteqarsinnaanissaq politikkikkut suli anguniagaavoq, taamaaliornikkut katsorsaaneq napparsimasup avatangiiserisaani ingerlanneqarsinaaqqullugu.

Tarnimikkut napparsimasut annertuumik sanngiitsut atugaasa pitsanngorsarneqarnissaat siunertaralugu suliniutit aallartinneqareersut ingerlateqqinneqalersaartut siunnersuummik siullermeerinermi Naalakkersuisut erseqqissumik oqaatigimmassuk ataatsimiititaliamit assut nuannaarutigineqarpoq. Tamatuma aalajangiusimaneqarnissaa aammalu inerisaanerit piviusunngortitsinerillu ingerlannerisa qasukkartinneqannginnissaat pingaaruteqartoq ataatsimiititaliamit oqaatigineqassaaq.

Tarnimikkut erloqissutillit isumaginninnermut suliffeqarnermullu tunngasuni pitsaanerpaamik atugassaqartinneqarnissaat, neqeroorfigineqarnissaat akuutinneqarnissaallu eqqarsaatigalugu peqqinnissaqarfiup isumaginnittoqarfiullu akornanni pitsaasumik suleqatigiissinniarneqarneranni suli annertuumik kinguaattooruteqartoqarpoq.

“Katsorsaaneq” aamma “isumaginninnikkut suliniutit” imminnut avissaaqqatinneqartuarnissaat ineriartornerup tungaanit isigalugu apeqqusernarmat ataatsimiititaliamit ilaatigut erseqqissarumaneqarpoq. Suliassa qarfiit pineqartut imminnut akulerunnerusariaqarsorinarput.

Ilaatigut Tuluit Nunaanni USA-milu ilisimatuussutsikkut allaaserisani tamanut saqqummiussatigut takutinneqarpoq inunnut tarnimikkut erloqissuteqanngitsunut sanilliullutik inuit tarnimikkut erloqissuteqartut akornanni suliffissaqanngitsut tallimariaammik amerlanerusut.<sup>1</sup>

Suliffeqarfinni napparsimanertik pissutigalugu sulinngitsoornerit tamarmiusut ilaat amerlasuut tarnikkut erloqissuteqarnermik pissuteqartut nunat tamalaat akornanni misissuinerit naapertorlugit takutinneqarpoq. Tamatuma saniatigut inuusuttut amerliartuinnartut tarnimikkut erloqissuteqarnermik kingunerisaanik aalajangersimasumik suliffeqalinngisaannarput. Taamaattumik tarnimikkut erloqissuteqarnerup inuttut inuiaqatigiillu aningaasaqarnerannut annertuumik kinguneqartarnera assortorneqarsinnaanngilaq, tamannalu Naalakkersuisut eqqumaffigisariaqarpaat.

### **Nalilersuinissat pisariaqartinneqarnerat pissarsiviunissaallu**

Inuit tarnimikkut erloqissutillit sulinneqarneranni pitsaassuseq aningaasanillu atuineq malunnaatilimmik pitsanngoriartinneqassappata ilisimatusarneq inerisaanerlu salliutinneqartariaqartut ataatsimiititaliamit isumaqatigiissutigineqarpoq. Taamaattumik peqqinnissaqarfimmi suliniutit periutsillu misiligarneqartut ingerlaavartumik nalilersorneqartarnissaat malitseqartinneqartarnissaallu pingaaruteqarpoq, taamaaliornikkut periutsit suliniutillu sunniutillit ingerlatiinnarneqarlutillu siammarterneqarsinnaaqqullugit, suliniutilli annikitsumik sunniutillit sunnuteqanngitsulluunniit unitsinneqarsinnaaqqullugit. Nunat tamalaat misilittagaasa takutippaat angusanik ersarissuutitsineq suliniutit pitsanngorsarnissaannut qitiusoq.

Inunnut tarnimikkut erloqissuteqartunut nutaaliaasumik, ammasumik akuliutsitsisumillu suliniarneq oqallinnissamut aammalu pitsanngorsaataasinnaasut isumaliutigineqarnissaannut periarfissiisarmat qularutissaanngilaq, tamatumalu saniatigut qulakkeerneqartarluni suliniutit pitsaassutsimut qaffassaataasut pisortanit sulisunillu eqqumaffigineqalerlutillu salliutinneqalertarnerat. Allatut oqaatigalugu ersarissuutitsinikkut suliniutimik pitsaasuunissaannik eqqumaffiginninnissamut inissiisarfiit sulisullu periarfissinneqartarput.

Suliassaqarfimmi nalilersuineq assigiinngitsunik ilusilerlugu assigiinngitsunillu qaffasissusilerlugu ingerlanneqarsinnaavoq. Nalilersuinerit uppernarsaatnik ilisimatusarnermillu tunngavilersugaasut nukinnik aningaasanillu atuiffiunerpaasarput, nalilersueriaatsilli taakkuinnaanngillat.

Napparsimasut, sulisut qanigisallu peqataatinneqarnissaannut ingerlaavartumik periarfissaqartitsilluni nalilersuineq aamma ingerlanneqarsinnaavoq. Akuusut,

<sup>1</sup> Marwaha S, Johnson S. Schizophrenia and emploment: A review. Soc Psychiatry Psychiatr Epidemiol 2004; 39: 337-49.

taakkunungalu ilanngullugit napparsimasut katsorsarneqartut, ingerlaavartumik nalunaaruteqartittarlugit nalilersuinerit taakku aaqqissuunneqarnerisigut suliniutit neqeroorutillu iluarsineqarsinnaapput, naleqqussarneqarsinnaallutik pitsanngorsarneqarsinnaallutillu.

Smiley-t atorlugit sullississutinik atuisut akissuteqarnerisigut sullississutinik imaluunniit katsorsaanernik ingerlatsisut ingerlaannartumik paasitinneqarsinnaapput. Alla ajornanngitsumik peruserineqarsinnaasoq, atuisunulli peqataatitsinissamut naleqquttoq tassaasinnaavoq nalilersuinerimut immersugassamik nassiussineq, tamatumani napparsimasut qanigisaasullu oqariartuteqarsinnaallutik pitsanngorsaattissanillu siunnersuuteqarsinnaallutik. Ingerlaavartumik nalilersuinerit taamaattut assersuutigalugu aningaaserivinni allakkerivinnilu ingerlanneqartartut tamatta nalunngilagut, taamaattumillu nalilersueriaatsit taamaattut nukippassuit atunngikkaluarlugit peqqinnissaqarfimmi soorunami aamma atorineqarsinnaapput.

Isumasiuinerit attuumassuteqartunut, misissuinnikkut tunngavissiat, paasissutissanik paasiniaaqqissaarnernut ilisimatusarnikkullu nalunaarusiornerit immikkut ilisimasaqarnissap saniagut nalilersuinerit ilisimatusarnermik tunngaveqartut siusinnerusukkut oqaatigineqareersutut sulisunik nukinnillu amerlanerusunik atuiffiusariaqartut. Ilisimatusarnermik tunngaveqarluni nalilersuinerit, misissuinerit misissueqqissaarnerillu taamaattut pissarsiaqaataasumik Kalaallit Nunaanni ilinniartitaanermi aaqqissuussinerup iluani ilinniagaqarfimmut attuumassuteqartunik suleqateqarluni ingerlanneqarsinnaapput.

Sullississutit neqeroorutit suliniuteqarfiillu suliniarfigineqartut allallu attuumassuteqartut akuutinneqarnerisigut peqqinnissaqarfimmit isumaginninnermillu ingerlaavartumik nalilerneqarlutillu misissuiffigineqartarnissaat ataatsimiititaliamit nalinginnaasumik kaammattuutigineqassaaq. Taakku assersuutigalugu tassaasinnaapput, napparsimasunik sullissineq, utoqqarnut atugassarititaasut pissutsillu, innarluutillit, meeqqat inuusuttullu kiisalu inuit pisortanit ikiorsiissutit pillugit maleruagassat malillugit ikiorserneqartartut.

### **Tarnimikkut nappaatilinnik sullissinermut tunngasunik aaqqissuussinermi nunani allani misilittakkat**

Nunat piffiillu sulisoqarnikkut, nunatamikkut attaveqarnikkullu kiisalu teknikkikkut Kalaallit Nunaannisulli unammilligassallit saniatigut Kalaallit Nunaanni tarnimikkut nappaatilinnut tunngasunik aaqqissuussinermi ineriartortitsinermilu nunanik avannarlernik suleqateqarnissap, ikiorteqarnissap misilittakkanillu avitseqateqarnissap ammaffiginissaa ataatsimiititaliamit pingaartinneqarpoq.

Norgemi tarnimikkut napparsimasunut uninngavinni siniffiit najukkani ulloq unnuarlu illunik taaserneqarsinnaasimapput, taakkunani pinartoqartillugu unitsitsisoqarsinnaalluni,

taamaalillunilu qanigisat matumani ilanngullugit ikinngutit ilaquuttallu ungasillivallaarnissaat pinngitsoortinneqartarluni.

Tarnimikkut silamikkulluunnit nappaatillit innarluutilinnut sanilliullutik inuuniarnermikkut atugaat amerlasuutigit ajornerusut Sverigemi paasineqarmat tarnimikkut napparsimasut tarnikkut akornutilittut taaguuserneqarput, tamatumalu kingorna tarnimikkut napparsimasut isumaginninnikkut suliassaqaqarfiup akisussaaffiinut ilanngunneqarlutik.

Tarnimikkut napparsimasunik suliassaqaqarfiup iluani katsorsaaneramik suliniutit saniatigit tarnimikkut napparsimasut pillugit peqqinnissaqaqarfiup isumaginninnermilu immikkoortortaqaqarfiup aammalu isumaginninnikkut immikkoortortaqaqarfiup suliffissaqartitsiniarnerullu akornanni qanoq pitsaasumik suleqatigiittoqarsinnaanera pillugu misilittagaqalernissap sulissutiginnissaa naleqquppoq. Matumani tarnimikkut silamikkulluunniit nappaatillit pisortanit pilersorneqarnerisa attatiinnarneqarneraninngarnit suliffissaqartitsiniarnermut attuumassuteqalernissamut periarfissaasa pitsanngorsarneqarnissaat siunertaralugu.

### **Ilinniartitaaneq ineriartornerlu**

Tarnimikkut nappaatilinnut tunngasuni ilinniartitaanerup ineriartortitsinerullu ingerlaannarnissaa pisariaqarmat ilanngullugu ataatsimiititaliamit isumaqatigiissutigineqarpoq.

Peqqinnissaqaqarfiup iluani tarnimikkut nappaatilinnik sullissinermi siunnerfeqarluni ineriartortitsinikkut ilinniartitsinikkullu sulisut tamarmik piginnaaneqarlutik ulluinnarni suliassaminnik isumaginnissinnaanissaat qulakkiissavarput.

Tamanna aaqqissuussamik pissaaq. Tamanna ilaatigit pisinnaavoq tarnimikkut nappaatilinnut tunngasuni piginnaasanik ineriartortitsinermi periusissamik Naalakkersuisut ineriartortitsinerisigut, taamaaliornikkut:

- Ilisimasanik paarlaasseqatigiittarnermi aamma ilisimasanik katersinermi pitsaassuseq attatiinnassavarput
- Sulisut ineriartortinneqarnissaannut, tigummiinnarnissaannut sulisussarsiornermilu atugassarititaasunik pilersitsissaagut
- Tarnimikkut nappaatilinnut tunngasumik suliassat ilisimasatigit naammattumik qaffasissusilimmik aammalu nunatsinni kulturimik, oqaatsit, eqqarsartaatsimik pissutsillu allanik immikkut ittunik aallaaveqarluni piffissaq ungasinnerusoq isigalugu isumagineqassapput.

**Siunnersuutip aningaasatigut kingunerisassai**

Inatsisartut suleriaasianni § 33, imm. 1 naapertorlugu aalajangiiffigisassatut siunnersuutip piviusunngortinneqarnerani aningaasatigut allaffissornikkullu kingunerisassat siunnersuummut tunngavilersuummi nassuiaatigineqassapput.

Tamanna naapertorlugu siunnersuutip piviusunngortinneqarnerani aningaasatigut kingunerisassat siunnersuummi nalunaarneqartut ataatsimiititaliap maluginiarpaa, taannalu malillugu

*naatsorsuutigineqarluni Naalackersuisut pisortaqaqfiinut aningaasatigut killiliussaareersut iluanni siunnersuut piviusunngortinneqarsinnaassasoq. Pisortaqaqfinni suliaassanut allanut peqatigitillugu taamatut periarfissaqassanngippat naatsorsuutigaara Naalackersuisut tamanna pillugu akissuteqaamminni erseqqissumik nalunaaruteqarfigiumaaraat, tamatuma kingornagut siunnersuutip qanorpiaq aningaasalersorneqarnissaa Inatsisartut isummerfigisariaqassammassuk.*

**Ataatsimiititaliap inassuteqaatai**

**Ataatsimiititaliami amerlanerussuteqartut** Siumut aamma Inuit Atataqatigiit siunnersuut pillugu eqikkaallutik ima oqaaseqaateqarput:

Sinerissami tarnikkut napparsimasut sullinneqarnerisa piaartumik naliliivigineqarnissaa kajumissuseqarfigineqartoq ataatsimiititaliami amerlanerussuteqartut Inuit Ataqatigiit aamma Siumut isumaqarput. Pissusissamisunngitsut siusinnerusukkut eqqumaffigineqalerpata suliniutit siusinnerusukkut iluarsineqarlutillu pitsanngorsarneqarsinnaapput. Inuppassuit tarnimikkut nappaateqarput.

nunap angissusianut naleqqiullugu innuttai kingullermik naatsorsuineq naapertorlugu 56.282-iusuni<sup>2</sup> inuit 900-t tarnimikkut erloqissuteqartut amerlapput. Innuttaaqataasut amerlaqisut tarnimikkut erloqissuteqartunut qanigisaammata erseqqissassallugu aamma pingaaruteqarpoq. Sukumiisumik pitsaasumillu sullissinikkut ataatsimut isigalugu inuunerissaarnissap nalinginnaasumik nukittorsarneqarnerata saniatigut nunatsinni innuttaasut amerlaqisut pitsaasumik sunnerneqassapput, taamaattumik nalilersuinerit piaartumik aallartinneqarnissaat salliutinneqartariaqarpoq.

Nalilersuinerit imaanngilaq ilisimatusarnermik tunngaveqartariaqartut imaluunniit nukinnik amerlasuunik ilinniakkatigulluunniit immikkorluinnaq piginnaasaqarnissamik pisariaqartitsiviussasut. Annikinnerusumik aallartittoqarsinnaavoq. Sullitat sulisut qanigisaasullu peqataatillugit nalilersuineq aallartissutaasinnaavoq naleqquttoq, taamaaliornikkut nukippassuit atunngikkaluarlugit katsorsaanermik suliniarneq pillugu pisariaqartinneqartumik nalunaartoqarsinnaallunilu qisuariartoqarsinnaavoq.

<sup>2</sup> Kalaallit Nunaanni Naatsorsueqqissaartarfik (Jan. 2014)

Uteqqiattumik ingerlaavartumillu nalilersuisarnissat aallartinneqarnissaannik kissaatip aalajangiusimaneqarneratigut imaanngilaq tamatuma peqatigisaanik sullitat sulisullu katsorsaasut akuutinnerisigut tarnimikkut napparsimasunut tunngasut pillugit UKA 2017-imi saqqummiunneqartussamik nalilersuinissamik Naalackersuisut anguniagaqarnerat taperseineqanngitsoq.

**Tamanna tunngavigalugu ataatsimiititaliami amerlanerussuteqartut siuliani taaneqartut siunnersuut ilusimisuut iluseqartoq akuerineqassasoq inassutigaa.**

**Ataatsimiititaliami ikinnerussuteqartut Atassummeersut siunnersuut pillugu ima oqaaseqaateqarniarput:**

Pineqartumi napparsimasut akuutinneqarnissaat aammalu nalilersuinerit qitiulluinnarput naleqqullutik assullu pingaaruteqarlutik. Naalackersuisut allannguutissatut siunnersuutaat tunngavilersorluakkatut Atassutip isumaqarfigaa, tarnimikkullu nappaatilinnut tunngasut ataatsimut nalilersornissaat qilanaaralugu.


Ingerlaavartumik nalilersuinerit nukissanik atuiffiusorujussuusinnaaneri aammalu katsorsaaneermik suliaqarnermit nukinnik sulisunilu nuussiffiusariaqarnissaat Atassutip ernumassutigisinnaavaa, tamanna napparsimasut inuunerinut pitsaanngitsumik sunnuteqarsinnaammat. Peqqinnissaqarfiup pingaartumillu tarnimikkut nappaatilinnut tunngasup sulisunik aningaasanillu amerlanerusunik tunineqarnissaat Atassutip maannakkuugallartoq periarfissaqarsorinngilaa, naak tamanna politikikkut kissaatiginartinneqarsinnaagaluartoq. Sulisutigut aningaasatigullu nukissat pioreersut iluanni 2017 sioqqullugu piffissap qiteqqunnerani naliliinissaq ajornanngippat tamanna Atassummit tikilluaqquneqassaaq.

**Tamanna tunngavigalugu ataatsimiititaliami ikinnerusussuteqartut siuliani taaneqartut siunnersuutaqaartoq itigartinneqassasoq aammalu Naalackersuisut allannguutissatut siunnersuutaat akuerineqassasoq inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Lars P. Mathæussen,  
Siulittaasoq



Knud Kristiansen




Karl-Kristian Kruse



28. maj 2014

UPA 2014/156



Anders Olsen



Agathe Fontain



Mimi Karlsen



Juliane Henningsen

**UPA 2014/156**

J.nr. 01.38.01.03-00047

J.nr. 01.25.01/14FM-LABU-00156